## 05 數念的滋味

吳心燕

有一項好食物予我思思念念,按怎揣都揣袂著仝款的 滋味,彼就是阮阿伯手工做的筍仔包,到今猶揣無佮伊會 當比並的。

國中的時,課業愈來愈重,我驚綴人袂著,讀冊讀到 三更半暝是誠四常的代誌。外口暗摸摸,佳哉有蹛阮對面 的阿伯和我做伴。伊佇遐做包仔、饅頭,對窗仔週過來的 電火光予我加真安心。逐暗阿伯會先炊饅頭,紲落來一床 一床的包仔就接續出爐囉。一陣一陣的芳氣衝對我遮來, 予人接載袂牢,我的腹肚嘛枵甲 kū-kū 叫,就走過去揣阿 伯。「阿伯你會忝袂?有需要鬥相共無?」阿伯早就看出出, 知影我是予芳味唌來的,隨共一粒白 phau-phau、幼麵麵的 包仔朱予我,共我講:「燒喔!欲食偌濟做你提,食飽通好 去睏,囡仔人愛睏有飽眠才會勢大漢。」

阿伯做的包仔有豆沙包、高麗菜包,啊若筍仔包就愛等到竹筍大出的時才食會著。新曆四、五月仔開始,便若過畫,種竹筍的阿叔會載兩布袋的筍仔,园佇阿伯個兜的門跤口。看著筍仔我就暗暗仔歡喜,又閣有我上愛的筍仔包通食囉!

下晡時仔阿伯咧補眠、阿姆佇灶跤咧無閒,若較早放學,我就會入去灶跤鬥相共。阿姆的跤手真猛掠,兩布袋的筍仔,伊一下手就共殼剝甲好勢溜溜。菜刀攑咧,無一觸久仔一支一支的筍仔就變做規桶的筍絲,那佮我講話雙手痲無停睏。灶頭大鼎的煙一直衝,我干焦會曉做添柴的雜差仔工爾爾。做食的有影無輕可,一大桶的筍仔倒落去大鼎,就算我氣力催甲盡磅嘛抐伊無法。翕熱的燒氣予人規身軀流汗糝滴,原來我愛食的筍仔包是遮爾仔厚工。

這馬阿伯、阿姆攏無佇咧矣,我揣無記持內底彼種氣味的筍仔包。便若看著有人咧賣包仔,我攏會行倚去共問講:「有賣筍仔包無?」毋過食過遐濟擔,猶是揣無我思思念念的好滋味,予我有淡薄仔失望。

一粒普通的筍仔包,有我對親人深深的懷念,是任何 山珍海味攏無法度代替的。你若有食過,無定著會佮我仝 款愛著這味喔!